

籌
遼
碩
畫

卷一

卷二

卷三

卷四

卷五

卷六

卷七

卷八

卷九

卷十

籌遼碩畫卷之二十八

己未仲秋

天都程開祜仲秩父輯

○經畧遼東熊廷弼題爲恭報代期併陳初到事宜以慰

聖懷事該職出關一路日期前疏已經報聞今月初二日行至海州教場與舊經臣楊鎬交代隨將原領

欽發關防令旗令牌併付與職職接受任事時鐵嶺初陷復聞東西虜合營而南遼瀋軍民外

竄者一路絡繹不絕職差官執旗諭令止之
有聽諭而還者有徑去不返者初三日入遼
陽城延見文武吏士皆公舉鄉官知州李尚
浩先將家眷搬回搖惑人心職責而繫之併
責一二富生巨室皆搬回家眷而人心始定
初四日巡城城上舊用川兵搭棚住守職以
爲示弱且強兵不以禦于外而爲嬰城自守
之計非策也撤令營于城下亟編民兵之壯
者分梁守之因而閱視兵馬自將官以下皆

犒賞有差以慰其勞不動官銀自具金幣爲
地方拜謝賀世賢以示優異令監軍部道于
都司衙門議斬逆將劉遇節等以正軍法躬
祭撫清開鐵官軍士民人等慟哭悲號以吊
其死而感其存一路欵虜送馬到職者職皆
厚撫之乃暈大送馬三十匹賞尤加厚北關
金白二酋差中軍擺言荅裏等來賀職且求
復開原共資犄角職遣萬里侯厚賞往慰示
必復之意以固其心又議遣使諭宰煖等酋

設詞激怒以離其黨數日之間諸凡可以收
拾人心激勵士氣羈縻夷虜及一應軍中急
切事宜如買馬採草招匠開局置烽撥探之
類無不舉行粗有次第惟是遼陽軍民有甲
有馬者皆配與總兵李如楨賀世賢防守瀋
陽虎皮驛一帶而城中雖有見兵及川兵二
三萬皆赤身徒步之士又零星雜亂無所統
一今雖令副總兵柴國柱搭配成營然無甲
無馬無火器實難守禦而此時又一無所有

可以供職之猝辦職亦惟有感之以血誠鼓之以忠義申之以號令守効死勿去之義爲遼東保此一塊土而成敗利鈍職固未能逆覩也職恐

皇上憂念特陳一二施行次第仰慰

聖懷至于楊鎬原領符驗已經鎬奏繳仍乞照例速賜施行

○直隸巡按王象恒題爲邊報緊急懇乞亟請盛甲硝黃以濟燃眉事據永平道袁應泰呈稱

本道單騎詣河流口修防處所查訪工程正
慮虎酋挾賞聲言入犯薊鎮其東協四路各
邊口如河流口與徐流口義院口桃林口界
嶺口羅漢洞及冷口一片石等處皆可萬馬
長驅方極目北望悵慨憂惶間忽接喜峰路
王都司報據撫夷通事徐萬金稟據屬夷頭
目小長禿男抽扣兒差夷孩子等二名到關
報稱今有東虜王子虎墩兔憨因爲連年荒
旱不收分投差役會合西虜王子罕孛羅土

等各聚兵馬停當八月二十前後議令罕孛
羅土伯暈大憨趕兔炒兔胡安台吉等領兵
犯搶潘家口迤西洪山馬蘭等路虎墩兔憨
與西虜伯暈阿亥等犯搶冷口迤東桃林界
嶺義院等處等語到道本道熟思犬羊叵測
終必一逞應援兵寡力單若乘虛分犯處處
是瑕遼左不能外蔽薊兵又已中虛其何所
恃而不恐乎凡修邊募兵簡料製器本道力
可爲者無不拮据而受事日淺要領未諳兼

各口軍器銀兩匱竭搜括厝處半月尚無着落今雖蒙發帑銀募兵而所募之兵來投者皆赤身空手兼以薊鎮隣遼抽調援兵獨多一番抽調一番馬匹器械隨之山海大將兩遣出關一番出關堅甲利兵隨之微獨新兵苦無盛甲器械并舊兵亦強半無有矣今固無錢糧爲製造軍資也卽製造能倉卒濟用乎合無懇乞請發工部盛甲二萬副硝二十萬斤黃四萬斤急濟軍需統惟蚤賜裁決亟

爲題請施行等因呈祥到職據此看得虎酋
耽耽邊外昨年挾賞于遼方投骨而去今復
欲挾賞于薊又啣尾而來雖聲言入犯固彼
平素狡謀而有備無患則我防禦長策况義
院口則有十九年長昂之變河流口則有三
十六年蟒金之變東協之患所從來矣則今
日虎酋之報豈盡虛哉除一切駕馭機宜聽
該道便宜行事外據稱所募新兵皆赤身空
手而舊兵器甲因柴鎮守出關又多帶去則

所請盛甲硝黃皆斷斷不容緩者伏乞

皇上卽

勅下該部速議給發以濟燃眉此疏應候督撫會
稿但恐路遠來遲遂急切具題

○南京兵科署科事禮科給事中臣晏文輝題爲
遼左危在旦夕上下志徂因循事無一行勢
難再振懇乞

聖明亟圖亟斷以固疆圉以奠

宗社事臣惟自古無久安長治之國而危亂亦

所時有第未形而圖者戒在張皇已形而圖者戒在猶豫故急一日則有一日之功緩一日則有一日之害遼左自撫順失陷主帥敗喪之後當事者不速圖以復而清河繼矣自清河再失二堡搶掠之後當事者又不速圖以復而三路之師潰矣自三路潰師大將連殞之後當事者亦不速圖以復而開原失潘鐵危大順堡十方寺堡又失矣則復開原以保全遼經畧熊廷弼之議誠爲上策然欲復

開原必須早計而

皇上可託疾宰相可杜門樞臣計臣可相爭執乎
同心一德聚精會神議及于兵便當速爲調
募議及于將便當速爲搜羅議及于餉便當
速爲措處凡部臣詞臣科道以及候命大小
諸臣之條議攄赤畢慮鑿鑿可行者便當速
爲批發卽

皇上未暇槩省而其中有喫緊者當事大臣便當
委曲舉行苟有利于

社稷夫何嫌夫權宜蓋救焚者不擇日拯溺者
不待時也廼今則一味苟且因仍毫無振作
一味虛文塗飾全無實際寇至則急寇去則
緩再至再急再去再緩調將而將不至募兵
而兵不集處餉而餉不齊致令新經畧出城
隻身數僕行宿通州有同兒戲何以宣威武
何以壯聲勢寧不令內外聞且見者竊笑哉
卽如共推閱視之姚宗文萬分所當急用者
數月以來下不力催上不特允豈以用經畧

可不用閱視耶不知當茲夷虜交訌倥偬之際經畧但能料理其綱維豈能細稽夫兵食昨南兵從陣回者曰遼兵實數不滿三四萬其中疲瘡者實多如我南兵在遼者凍折手足不能動移尚有數千人此等虛冒可無查乎又曰南兵去冬無糧借貸不敷及解糧將至衆已潰敗此等虛匿可無查乎又曰道臣康應乾見劉綎三日無報先避以爲民望寬奠遂爲一空此等虛職可無查乎乃當事者

但言兵與餉之當查而不急請去查之人其
何濟焉卽此一端而其餘可類推已故人謂
今日之事大類於宋而臣謂今日之禍尤烈
於宋也嘗考之宋不過顯奉道教冊封道君
未至擾擾營營黷貨恠財如今也不過誤聽
馬植誤激郭藥師未至泄泄沓沓失筭蕩紀
如今也不過專寵蔡京童貫梁師成未至槩
棄不任槩疑不信槩員缺不補聽其寥寥落
落鬱抑墮隕如今也然且金兵一再至而城